
Ordinaziun da taxas tar la lescha chantunala da geoinformaziun (OTLCGeo)

dals 20-12-2011 (versiun dals 01-01-2012)

sa basond sin l'art. 45 da la constituziun chantunala¹⁾

relaschada da la regenza ils 20 da december 2011

1. Disposiziuns generalas

Art. 1 Champ d'applicaziun

¹ Questa ordinaziun regla las taxas per expensas en connex cun la consegna da geodatas ch'èn mo per part accessiblas al public sco er en connex cun l'invista da talas geodatas.

² Ella regla plinavant las taxas en il rom da la mesiraziun uffiziala.

Art. 2 Taglia sin la plivalur

¹ La taglia sin la plivalur vegn messa a quint a norma da la legislaziun davart la taglia sin la plivalur. Ella n'è betg inclusa en las taxas.

2. Access a geodatas

Art. 3 Access limità da fin ad 1 onn

¹ Per l'access limità da maximalmain 1 onn a geodatas che n'èn betg accessiblas al public vegn incassada ina taxa.

² La taxa d'access importa almain 150 francs e maximalmain 800 francs.

Art. 4 Access illimità ed access limità da passa 1 onn

¹ En il rom d'ina cunvegna po ina persuna survegnir in access illimità u in access limità da passa 1 onn a tschertas geodatas ch'èn mo per part accessiblas al public.

¹⁾ DG [110.100](#)

* tabellas da las modificaziuns a la fin dal relasch

² Tals contracts ston pudair vegnir desditgs mintga onn.

³ La taxa d'access importa 800 francs per onn.

Art. 5 Prestaziuns spezialas

¹ Prestaziuns spezialas – sco la creaziun da products analogs e l'evaluaziun u la consegna da geodatas ordaifer ils servetschs da download – vegnan messas a quint tenor il temp impundi.

² Per l'onuraziun tenor il temp impundi vala maximalmain la tariffa per ura tenor la categoria D da las recumandaziuns da la conferenza da coordinaziun dals organs da construcziun e d'immobiglias dals patruns da construcziun publics (KBOB), almain dentant 50 francs per incarica.

3. Mesiraziun uffiziala

Art. 6 Princip

¹ Las taxas en il rom da l'actualisaziun currenta sa drizzan tenor la cunvegna davart l'urden d'onurari per l'actualisaziun da la mesiraziun uffiziala dals 20 da november 1996 (UO 33).

² L'uffizi relascha las explicaziuns necessarias per l'applicaziun da la UO 33.

Art. 7 Exclusiun da l'applitgabilidad da la UO 33

¹ En il sector da l'elavuraziun e da la consegna electronica da geodatas da la mesiraziun uffiziala (pos. 3341) vala l'artitgel 5. Resalvà resta l'incassament da taxas per l'autentificaziun tenor il dretg federal.

² L'indemnisaziun tras la vischnanca per segirar las datas (pos. 3342), per conservar las datas (pos. 3343), per dar infurmaziuns (pos. 3344) sco er per furnir las datas al chantun respectivamain al center da geodatas sto vegnir fixada tranter la vischnanca e la geometra-revisura u il geometer-revisur en il rom dal contract d'actualisaziun. L'uffizi relascha directivas per las indemnisaziuns.

Art. 8 Incaricas grondas

¹ La UO 33 vegn applitgà per incaricas fin a 25 000 francs (senza TPV). En cas da lavurs d'actualisaziun pli grondas ston l'incumbensadra u l'incumbensader e la geometra-revisura u il geometer-revisur far ina cunvegna e fixar il pretsch, e quai avant il cumenzament da las lavurs.

Art. 9 Chareschia

¹ Las tariffas da la UO 33 èn suttamessas a la chareschia che vegn communitgada mintga onn da la direcziun federala da mesiraziun.

4. Disposiziuns finalas

Art. 10 Aboliziun dal dretg vertent

¹ Cun l'entrada en vigur da questa ordinaziun vegn abolida l'ordinaziun davart las taxas per retrair extracts e valitaziuns da la mesiraziun uffiziala dals 18 d'avrigl 2006¹⁾.

Art. 11 Entrada en vigur

¹ Questa ordinaziun entra en vigur il 1. da schaner 2012.

¹⁾ CUL 2006, FUC 1415, e CUL 2007, FUC 4571

Tabella da las modificaziuns - tenor conclus

Conclus	Entrada en vigur	Element	Modificaziun	Publicaziun en la CUL
20-12-2011	01-01-2012	relasch	emprima versiun	-

Tabella da las modificaziuns - tenor element

Element	Conclus	Entrada en vigor	Modificaziun	Publicaziun en la CUL
relasch	20-12-2011	01-01-2012	emprima versiun	-